

共同經課-1 列王紀下五章一節～十四節

1 亞蘭王的軍長乃縵佇伊的主人的面前做大做尊貴，因為耶和華曾用伊互亞蘭得勝；伊也是大權能的勇士，總是癩疙(thái-ko)。2 前亞蘭人歸陣出去，對以色列地掠一個查某囡仔，伊就伺候乃縵的某。3 伊給伊的主母講：「苦袂得著我的主及撒瑪利亞的先知相及佇啲，伊的確會醫好伊的癩疙(thái-ko)4 有人入去給伊的主講，屬以色列地的查某囡仔按呢按呢講。5 亞蘭王講：「你去啊，我也欲寄一張批互以色列王。」乃縵就去，帶銀十他連得，金六千，衣裳十套；6 帶批到以色列王遐，批內講：「批到你遐的時，看啊，我差人臣乃縵去見你，你著醫好伊的癩疙(thái-ko)。」7 以色列王看批了，就拆裂伊的衫，講：「我豈是上帝，互人死，互人活嗎？此人竟然差人來我遮，教我醫好伊的癩疙(thái-ko)。請恁斟酌想，看此人怎樣尋縫攻擊我？」8 上帝的奴僕以利沙聽見以色列王拆裂伊的衫，就差人去見王，講：「你啥事拆裂衫啊？通互彼人到我遮，伊才知以色列中有先知。」9 乃縵就及伊的馬伊的車來倚佇以利沙的厝門口。10 以利沙差一個使者，給乃縵講：「你去約但河洗身軀七擺，你的肉就復原，你欲得著清氣。」11 乃縵就受氣退去，講：「我本拍算伊的確欲出來見我，倚啲求叫耶和華——伊的上帝的名，搖手佇患著的所在，來醫好癩疙(thái-ko)的。12 大馬色的河亞罷拿及法珥法豈無比以色列一切的水卡好嗎？我佇遐洗身軀袂得著清氣嗎？」就越轉身受氣做伊去。13 伊的奴僕進前，給伊講：「我的父啊，先知若教你去做一件大事，你豈無欲做嗎？何況伊干單給你講洗就清氣啊？」14 乃縵就落去，照上帝奴僕的話，佇約但河洗七擺；伊的肉復原，親像囡仔肉，伊就清氣。

共同經課-2 詩篇三十篇

1 〔此個詩是獻宮殿的歌，大衛做的。〕耶和華啊，我欲尊重你做至高，因為你曾提拔我，無互我的仇讎對我誇口。2 耶和華——我的上帝啊，我曾求叫你，你就醫好我。3 耶和華啊，你曾救我的靈魂對陰間起來，你互我活啲，免致入墓。4 耶和華聖的百姓啊，恁著唱歌嘔啵伊，記念伊的聖名來感謝伊。5 因為，伊的受氣不過目睨久；伊的恩典是一生的久，歸暝雖然有啼哭，早起時就有歡喜。6 論到我，我佇亨通的時，就講：我永袂搖拙。7 耶和華啊，你曾施恩，互我的山豎在堅固；你掩你的面，我就迫腹。8 耶和華啊，我求叫你；我對耶和華求恩，講：30:9 我流血，我入墓，有啥利益？塵埃豈會謳啵你，豈會報揚你的真實嗎？10 耶和華啊，求你聽我，憐憫我！耶和華啊，求你幫助我！11 你已經將我的啼哭變做跳舞，你將我的麻衫褪去，用歡喜給我繕，12 通互我的心神唱歌謳啵你，亦無靜靜。耶和華——我的上帝啊，我欲感謝你，到永遠！

共同經課-3 哥林多前書九章二十四節～二十七節

24 豈毋知在場鬥走的逐個攏走，若是得著報賞的只有一個？恁著按呢走，才通得著。25 見若鬥力的，逐項事擲節，in 是欲得著會敗壞的冕旒；若是咱是欲得著袂敗壞的。26 所以，我按呢啲走毋是親像無定著的方向；我拍拳無親像啲拍空氣。27 我拍我的身軀到殄殄，互伊降服，驚了我已經傳互別人，本身豈採抵著拒絕。

共同經課-4 馬可福音一章四十節～四十五節

40 有一個癩疙(thái-ko)的就近伊求伊，跪伊，給伊講：「你若肯，就會互我清氣。」41 耶穌可憐，伸手摸伊，給伊講：「我肯，你通清氣！」42 癩疙(thái-ko)即時除去，伊就清氣。43 耶穌嚴嚴警戒伊，隨時教伊去，44 也給伊講：「著謹慎，莫得給人講甚麼，獨獨著去將本身互祭司驗，亦為著你得著清氣，獻摩西所吩咐的，來做證據佇人。」45 總是伊出去，就大大宣傳，四界報揚此個事，致到耶穌無通閣顯然入城，獨獨住佇外面曠野的所在。人對四方就近伊。